

Da veloïns, cumbinellas fin tar gös auditivs

La Ludoteca Samedan do que daspö 40 ans. Inizio vaivan quatter Samedrinas il lö per impraster gös e giovarets. Cumanzo vaivan ellas cun var 40 giovarets in lur sortimaint. Intaunt es la spüerta creschida sün passa 800 gös e giovarets.

«L'idea da pudair spordscher gös da cumpagnia a famiglias u ad iffaunts in situaziuns finanzialmaing difficilas, es auncha hoz la finamira centrela da la Ludoteca a Samedan», disch *Luzi Oberer*, ün dals voluntaris. Cha'l gö saja auncha adüna cò per gnir insembel, giuver, guadagner, ma eir perder e per chürer la cumünaunza.

La spüerta da gös vain, scu ch'el cuntinue-scha, adüna darcho actualiseda e cuntegna qualchosa per giuven e vegl. «Dumandos sun auncha adüna figüras da Playmobil, ma eir costüms e gös auditivs.» Quels nu do que però plü in fuorma da cassetta, ma scu figüras cha's po tadler culs mezs dad hozindi.

Dapü spüerta, dapü lavur

La granda spüerta significha eir dapü lavur per las voluntarias ed ils voluntaris chi s'ingaschan per la Ludoteca. Actualmaing lavuran 12 voluntaris duos fin trais voutas il mais illa Ludoteca a Samedan. La societad Ludoteca vain sustgnida da las vschinaunchas da l'Engiadin'Ota e da differentas interpraisas privatas. In occasiun dal giubileum da 40 ans in sanda passada ho la societad da la Ludoteca organiso ün zievamezdi cun gös e divertimaint per pitschen e grand. (rtr/fmr)



Luzi Oberer es ün da la dunzaina da voluntaris chi lavura illa Ludoteca a Samedan.